

食貨典第二百七十九卷

酒部紀事二

史記漢高祖紀高祖爲泗水亭長好酒及色常從王媼武負貰酒醉臥武負王媼見其上常有龍怪之高祖每酤留飲酒讎數倍及見怪歲竟此兩家常折券棄責

漢書高祖紀十二年冬上破布軍于會舛布走令別將追之上還過沛留置酒沛宮悉召故人父老子弟佐酒發沛中兒得百二十人教之歌酒酣上擊筑自歌曰大風起兮雲飛揚威加海內兮歸故鄉安得猛士兮守四方

樊噲傳項羽在戲下欲攻沛公沛公從百餘騎因項伯面見項羽謝無有閉關事項羽既饗軍士中酒亞父謀欲殺沛公令項莊拔劍舞坐中欲擊沛公樊噲入立帳下項羽目之問爲誰張良曰沛公參乘樊噲也項羽曰壯士賜之卮酒彘肩噲既飲酒拔劍切肉食之項羽曰能復飲乎噲曰臣死且不辭豈特卮酒乎

史記曹相國世家平陽侯曹參代蕭何爲漢相國舉事無所變更一遵何約束日夜飲醇酒卿大夫

已下吏及賓客見參不事事來者皆欲有言至者參輒飲以醇酒間之欲有所言復飲之醉而後去終莫得開說以爲常相舍後園近吏舍吏舍日飲歌呼從吏惡之無如之何乃請參游園中聞吏醉歌呼從吏幸相國召按之乃反取酒張坐飲亦歌呼與相應和

漢書高五王傳齊悼惠王次子章嘗入侍燕飲高后令章爲酒吏章自請曰臣將種也請得以軍法行酒高后曰可酒酣章進歌舞頃之諸呂有一人醉亡酒章追拔劍斬之而還報曰有亡酒一人臣謹行軍法斬之太后左右大驚業已許其軍法亡以罪也因罷酒

史記游俠傳郭解爲人短小精悍不飲酒

漢書楚元王傳楚元王交少時嘗與魯穆生白生申公俱受詩於浮丘伯及秦焚書各別去高祖卽帝位立交爲楚王王旣至楚以穆生白生申公爲中大夫元王敬禮申公等穆生不耆酒元王每置酒常爲穆生設醴及王戊卽位常設後忘設焉穆生退曰可以逝矣醴酒不設王之意怠不去楚人將鉗我于市遂謝病去申公白生獨留王戊稍淫暴二人諫不聽胥靡之使杵臼雅春于市

西京雜記梁孝王遊于忘憂之館集諸遊士各使爲賦鄒陽爲酒賦其詞曰清者爲酒濁者爲醴清

者聖明濁者頑騃皆糴渚丘之麥釀野田之米倉風莫預方金未啟嗟同物而異味嘆殊才而共侍
流光醪醑甘滋泥泥醪釀既成綠瓷既啟且筐且漉載簋載齊庶民以爲歡君子以爲禮其品類則
沙洛淥鄴程鄉若下高公之清關中白薄青渚繁停凝醪醇酎千日一醒哲王臨國綽矣多暇召幡
幡之臣聚肅肅之賓安廣坐列雕屏綃綺爲席犀璫爲鎮曳長裾飛廣袖奮長纓英偉之士莞爾而
卽之君王憑玉几倚玉屏舉手一勞四座之士皆若哺梁焉乃縱酒作倡傾盤覆觴右曰宮中旁亦
徵揚只之深不狂于是錫名餌祛夕醉遣朝醒吾君壽億萬歲常與日月爭光

史記司馬相如傳文君夜亡奔相如相如乃與馳歸成都家居徒四壁立文君久之不樂曰長卿第
俱如臨邛從昆弟假貸猶足爲生何至自苦如此相如與俱之臨邛盡賣其車騎買一酒舍酤酒而
令文君當鑪相如身自著犢鼻褌與保庸雜作滌器于市中卓王孫聞而恥之爲杜門不出昆弟諸
公更謂王孫曰有一男兩女所不足者非財也今文君已失身于司馬長卿長卿故倦游雖貧其人
材足依也且又令客獨奈何相辱如此卓王孫不得已分予文君僮百人錢百萬及其嫁時衣被財
物文君乃與相如歸成都買田宅爲富人

五宗世家中山靖王勝爲人樂酒好肉

漢書任敖傳敖封廣阿侯食邑千八百戶傳子至曾孫越人坐爲太常廟酒酸不敬國除

東方朔傳朔爲大中大夫給事中隆慮公主子昭平君尙帝女夷安公主隆慮主病因以金千斤錢千萬爲昭平君豫贖死罪上許之隆慮主卒昭平君日驕醉殺主傳獄繫內官以公主子廷尉上請請論左右人人爲言前又入贖陛下許之上曰吾弟老有是一子死以屬我于是爲之垂涕嘆息良久曰法令者先帝所造也用弟故而誣先帝之法吾何面目入高廟乎又下負萬民迺可其奏哀不能自止左右盡悲朔前上壽曰臣聞聖王爲政賞不避仇讎誅不擇骨肉書曰不偏不黨王道蕩蕩此二者五帝所重三王所難也陛下行之是以四海之內元元之民各得其所天下幸甚臣朔奉觴昧死再拜上萬歲壽上迺起入省中夕時召讓朔曰傳曰時然後言人不厭其言今先生上壽時乎朔免冠頓首曰臣聞樂太甚則陽溢哀太甚則陰損陰陽變則心氣動心氣動則精神散精神散而邪氣及銷憂者莫若酒臣朔所以上壽者明陛下正而不阿因以止哀也愚不知忌諱當死先是朔嘗醉入殿中小遺殿上劾不敬有詔免爲庶人待詔宦者署因此對復爲中郎賜帛百匹

庾穆之湘州記君山上有美酒數斗得飲之卽不死爲神仙漢武帝聞之齋居七日遣樂巴將童男女數十人來求之果得酒進御未飲東方朔在旁竊飲之帝大怒將殺之朔曰使酒有驗殺臣亦不死無驗安用酒爲帝笑而釋之寺僧云春時往往聞酒香尋之莫知其處

漢書灌夫傳夫爲太僕與長樂衛尉竇甫飲輕重不得夫醉搏甫甫太后昆弟上恐太后誅夫徙爲燕相數歲坐法免家居長安夫爲人剛直使酒不好文學喜任俠已然諾家居卿相待中賓客益衰及竇嬰失勢亦欲倚夫引繩排根生平慕之後棄者夫嘗有服過丞相蚡蚡從容曰吾欲與仲孺過魏其侯會仲孺有服夫曰將軍酒肯幸臨况魏其侯夫安敢以服爲解請語魏其具將軍旦日蚤臨蚡許諾夫以語嬰嬰與夫人益市牛酒夜灑掃張具至旦平明令門下候司至日中蚡不來嬰謂夫曰丞相豈忘之哉夫不懌曰夫以服請不宜迺駕自往迎蚡蚡特前戲許夫殊無意往夫至門蚡尙臥也于是夫見曰將軍昨日幸許過魏其魏其夫妻治具至今未敢嘗食蚡悟謝曰吾醉忘與仲孺言迺駕往往又徐行夫愈益怒及飲酒酣夫起舞屬蚡蚡不起夫徙坐語侵之嬰迺扶夫去謝蚡蚡卒飲至夜極驪而去元光四年春蚡言灌夫家在潁川橫甚民苦之請案之上曰此丞相事何請夫

亦持蚡陰事爲姦利受淮南王金與語言賓客居間遂已俱解夏蚡取燕王女爲夫人太后詔召列侯宗室皆往賀嬰過夫欲與俱夫謝曰夫數以酒失過丞相丞相今者又與夫有隙嬰曰事已解彊與俱酒酣蚡起爲壽坐皆避席伏已嬰爲壽獨故人避席餘半膝席夫行酒至蚡蚡膝席曰不能滿觴夫怒因嘻笑曰將軍貴人也畢之時蚡不肯行酒次至臨汝侯灌賢賢方與程不識耳語又不避席夫無所發怒迺罵賢曰平生毀程不識不直一錢今日長者爲壽迺效女曹兒咕嚕耳語蚡謂夫曰程李俱東西宮衛尉今衆辱程將軍仲孺獨不爲李將軍地乎夫曰今日斬頭穴匈何知程李坐乃起更衣稍稍去嬰去戲夫夫出蚡遂怒曰此吾驕灌夫罪也迺令騎留夫夫不得出藉福起爲謝案夫項令謝夫愈怒不肯順蚡迺戲騎縛夫置傳舍召長史曰今日召宗室有詔劾灌夫罵坐不敬繫居室遂其前事遣吏分曹逐捕諸灌氏皆得棄市罪

拾遺記漢武帝思懷往者李夫人不可復得時始穿昆靈之池泛翔禽之舟帝自造歌曲使女伶歌之時日已西傾涼風激水女伶歌聲甚適因賦落葉哀蟬之曲曰羅袂兮無聲玉墀兮塵生虛房冷而寂寞落葉依于重扇望彼美之女兮安得感余心之未寧帝聞唱動心悶悶不自支持命龍膏具

燈以照舟內悲不自止親侍者覺帝容色愁怨乃進洪梁之酒酌以文螺之卮卮出波祇之國酒出洪梁之縣此屬右扶風至哀帝廢此邑南人受此釀法今言雲陽出美酒兩聲相亂矣

洞冥記武帝起神明臺上有九天道金牀象席琥珀鎮雜玉爲簞帝坐良久設甜水之冰以備沐濯酌瑤琨碧酒

韓詩外傳人有市酒而甚美者置表甚長然至酒酸而不售問里人其故里人曰公之狗甚猛而人有持器而欲往者狗輒迎而齧之是以酒酸不售也士欲白萬乘之主用事者迎而齧之亦國之惡狗也

漢書韓延壽傳延壽代蕭望之爲左馮翊坐棄市吏民數千人送至渭城老小扶持車轂爭奏酒炙延壽不忍距逆人人爲飲計飲酒石餘

拾遺記宣帝地節元年樂浪之東有皆明之國來貢其方物言其鄉在扶桑之東見日出于西方其國昏昏常闇宜種白穀名曰融澤方三千里五穀皆良有醇和麥爲麴以釀酒一醉累月食之凌冬可租其國獻之

漢書趙充國傳充國爲後將軍衛尉上初置金城屬國以處降羌詔舉可護羌校尉者時充國病四府舉辛武賢小弟湯充國遽起奏湯使酒不可典蠻夷不如湯兄臨衆時湯已拜受節有詔更用臨衆後臨衆病免五府復舉湯湯數醉酗羌人羌人反畔卒如充國之言

丙吉傳吉居相位上寬大吉馭吏耆酒數進蕩嘗從吉出醉歐丞相車上西曹主吏白欲斥之吉曰以醉飽之失去士使此人將復何所容西曹地忍之此不過汙丞相車茵耳遂不去也此馭吏邊郡人習知邊塞發奔命警備事嘗出適見驛騎持赤白囊邊郡發奔命書馳來至馭吏因隨驛騎至公車刺取知虜入雲中代郡遽歸府見吉白狀因曰恐虜所入邊郡二千石長吏有老病不任兵馬者宜可豫視吉善其言召東曹案邊長吏瑣科條其人未已詔召丞相御史問以虜所入郡吏吉具對御史大夫卒遽不能詳知以得譴讓而吉見謂憂邊思職馭吏力也吉乃歎曰士人不可容能各有所長嚮使丞相不先聞馭吏言何見勞勉之有

循吏傳龔遂爲渤海太守數年上遣使者徵遂議曹王生願從功曹以爲王生素耆酒人節度不可使遂不忍逆從至京師王生日飲酒不視太守會遂引入宮王生醉從後呼曰明府且止願有所白

遂還問其故王生曰天子卽問君何以治渤海君不可有所陳對宜曰皆聖主之德非小臣之力也遂受其言旣至前上果問以治狀遂對如王生言天子說其有讓

蓋寬饒傳寬饒爲司隸校尉平恩侯許伯入第丞相御史將軍中二千石皆賀寬饒不行許伯請之迺往從西階上東鄉特坐許伯自酌曰蓋君後至寬饒曰無多酌我我迺酒狂丞相魏侯笑曰次公醒而狂何必酒也

叙傳班伯以侍中光祿大夫養病賞賜甚厚數年未能起會許皇后廢班婕妤供養東宮進侍者李平爲婕妤而趙飛燕爲皇后伯遂稱篤久之上出過臨候伯伯惶恐起眠事自大將軍薨後富平定陵侯張放淳于長等始愛幸出爲微行行則同輿執轡入侍禁中設宴飲之會及趙李諸侍中皆引滿舉白談笑大噱時乘輿幄坐張畫屏風畫紂醉踞妲己作長夜之樂上以伯新起數目禮之因顧指畫而問伯紂爲無道至于是乎伯對曰書云迺用婦人之言何有踞肆于朝所謂衆惡歸之不如是之甚者也上曰苟不若此此圖何戒伯曰沈湎于酒微子所以告去也式號式譟大雅所以流連也詩書淫亂之戒其原皆在于酒上迺喟然嘆曰吾久不見班生今日復聞讜言

五行志永始元年九月丁巳晦日有食之咎永以京房易占對曰元年九月日蝕酒亡節之所致也獨使京師知之四國不見者若曰湛酒于酒君臣不別禍在內也

朱博傳博爲御史大夫爲人廉儉不好酒色自微賤至富貴食不重味案上不過三杯

游俠傳陳遵爲校尉封嘉威侯居長安中列侯近臣貴戚皆貴重之牧守當之官及郡國豪傑至京師者莫不相因到遵門遵嗜酒每大飲賓客滿堂輒關門取客車轄投井中雖有急終不得去嘗有部刺史奏事過遵值其方飲刺史大窮候遵霑醉時突入見遵母叩頭自白當對尙書有期會狀母迺令從後閣出去遵大率常醉然事亦不廢遵爲河南太守而弟級爲荊州牧當之官俱過長安富人故淮陽王外家左氏飲食作樂後司直陳崇聞之劾奏遵兄弟幸得蒙恩超等歷位遵爵列侯備郡守級州牧奉使皆以舉直察枉宣揚聖化爲職不正身自慎始遵初除乘藩車入閭巷過寡婦左阿君置酒譌謳遵起舞跳梁頓仆坐上暮因留宿爲侍婢扶臥遵知飲酒飫宴有節禮不入寡婦之門而湛酒溷肴亂男女之別輕辱爵位羞汙印綬惡不可忍聞臣請皆免遵旣免歸長安賓客愈盛飲食自若久之復爲九江及河內都尉凡三爲二千石而張竦亦至丹陽太守封淑德侯後俱免官

以列侯歸長安疎居貧無賓客時時好事者從之質疑問事論道經書而已而遵晝夜呼號車騎滿門酒肉相屬先是黃門郎揚雄作酒箴以諷諫成帝其文爲酒客難法度士譬之於物曰子猶瓶矣觀瓶之居居井之眉處高臨深動常近危酒醪不入口臧水滿懷不得左右牽於纆微一旦重礙爲蟻所軋身提黃泉骨肉爲泥自用如此不如鴟夷鴟夷滑稽腹如大壺盡日盛酒人復借酤常爲國器託於屬車出入兩宮經營公家繇是言之酒何過乎遵大喜之常謂張疎吾與爾猶是矣足下諷誦經書苦身自約不敢差跌而我放意自恣浮湛俗間官爵功名不減于子而差獨樂顧不優邪疎曰人各有性長短自裁子欲爲我亦不能吾而效子亦敗矣雖然學我者易持效子者難將吾常道也及王莽敗二人俱客于池陽疎爲賊兵所殺更始至長安大臣薦遵爲大司馬護軍與歸德侯劉颯俱使匈奴單于欲脅詘遵遵陳利害爲言曲直單于大奇之遣還會更始敗遵留朔方爲賊所敗時醉見殺

名醇酎

西京雜記漢制宗廟八月飲酎用九醞太牢皇帝侍祠以正月旦作酒八月成名曰酎一曰九醞一

後漢書劉元傳元字聖公弟爲人所殺聖公結客欲報之客犯法聖公避吏于平林

注

續漢書曰時

聖公聚客家有酒請游徼飲賓客醉歌言朝亭兩都尉游徼後來用調羹味游徼大怒縛捶數百

更始爲天子日夜與婦人飲讌後庭群臣欲言事輒醉不能見時不得已乃令侍中坐帷內與語諸將識非更始聲出皆怨曰成敗未可知遽自縱放若此韓夫人尤嗜酒每侍飲見常侍奏事輒怒曰帝方對我飲正用此時持事來乎起抵破書案

劉隆傳隆上將軍印綬賜養牛上樽酒十斛

注

稻米一斗得酒一斗爲上樽稷米一斗爲中樽粟米

一斗爲下樽

馬武傳武封陽虛侯留奉朝請爲人嗜酒闊達敢言時醉在御前面折同列言其短長無所避忌帝故縱之以爲笑樂

吳良傳良初爲郡吏歲旦與掾史入賀門下掾王望舉觴上壽諂稱太守功德良于下坐勃然進曰望佞邪之人欺諂無狀願勿受其觴太守斂容而止讌罷轉良爲功曹

竇融傳融領將作大匠乞骸骨詔令歸第養病歲餘聽上衛尉印綬賜養牛上樽酒

宋書符瑞志漢章帝西巡得銅器于岐山似酒尊詔在道晨夕以爲百官熱酒

博物志王爾張衡馬均昔冒重霧行一人無恙一人病一人死問其故無恙人曰我飲酒病者食死者空腹

後漢書楊震傳震子秉爲太尉性不飲酒又早喪夫人遂不復娶所在以淳白稱嘗從容言曰我有三不惑酒色財也

蔡邕傳初邕在陳留其鄰人有目酒食召邕者比往而主已酣焉

龍城錄蔡邕因醉路臥人名曰醉龍

後漢書五行志桓帝之末京都童謠曰茅田一頃中有井四方纖纖不可整嚼復嚼今年尚可後年饒案易曰嚼復嚼者京都飲酒相強之辭也言食肉者鄙不恤王政徒耽宴飲歌嘯而已也

盧植傳植性剛毅有大節常懷濟世志不好辭賦能飲酒一石

劉寬傳寬熹平五年代許訓爲太尉靈帝頗好學執每引見寬常令講經寬嘗于坐被酒睡伏帝問太尉醉邪寬仰對曰臣不敢醉但任重責大憂心如醉帝重其言寬簡略嗜酒不好盥浴京師目爲

諺嘗坐客遣蒼頭市酒迂久大醉而還客不堪之罵曰畜產寬須臾遣人視奴疑必自殺顧左右曰此人也罵言畜產辱孰甚焉故吾懼其死也

益都耆舊傳楊子拒妻者劉懿公女也字恭璞貞烈違禮有四男二女拒早亾教遵閨門動有法則長子元琮嘗出飲酒日晏乃自輿而歸母不見十日元琮因諸弟謝過乃數責之曰夫飲食有節不至流湏者禮也汝乃沉荒慢而無禮自爲敗首何以帥先諸弟也

史典論中常侍張讓子奉爲太醫令與人飲酒輒繫引衣裳發露形體以爲戲樂將罷又亂其履舄使小大差踣無不傾到僵仆踈跌手足因隨而笑之

風俗通陳國有趙祐者酒後自相署或稱亭長督郵祐復于外騎馬將絳幡云我使者也司徒鮑宣決獄云騎馬將幡起于戲耳無他惡意 汝南張妙酒後相戲逐縛捶二十下又懸足指遂至死鮑昱決事云原其本意無賊心宜減死 巴郡宋遷母名靜往阿奴家飲酒遷母坐上失氣奴謂

遷曰汝母在坐上何無宜適遷曰腸痛誤耳人各有氣豈止我遷罵奴乃持木枕擊遷遂死

英雄記鈔孔融天性氣爽頗推平生之意狎侮太祖太祖制酒禁而融書喟之曰天有酒旗之星地

列酒泉之郡人有旨酒之德故堯不飲千鍾無以成其聖且桀紂以色亡國今令不禁婚姻也太祖外雖寬容而內不能平御史大夫郝慮知旨以法免融官歲餘拜大中大夫雖居家失勢而賓客日滿其門愛才樂酒常嘆曰坐上客常滿樽中酒不空吾無憂矣虎賁士有貌似蔡邕者融每酒酣輒引與同坐曰雖無老成人尙有典型其好士如此

蒼梧雜志孫權叔濟嗜酒不治生產嘗欠人酒緡謂人曰尋常行處欠人酒債欲質此縵袍償之酒債尋常行處有本此

後漢書呂布傳布從袁術遣高順攻劉備于沛破之曹操遣夏侯惇救備爲順所敗操乃自將擊布至下邳塹圍之壅沂泗以灌其城三月上下離心其將侯成使客牧其名馬而客策之以叛成追客得馬諸將合禮以賀成成分酒肉先入詣布而言曰蒙將軍威靈得所亡馬諸將齊賀未敢嘗也故先以奉貢布怒曰布禁酒而卿等醞釀爲欲因酒共謀布耶成忿懼乃與諸將共執陳宮高順率其衆降布與麾下登白門樓兵圍之急布乃降

鄭康成別傳袁紹邀飲于城東必欲元醉時會者三百人酣酒之後人人進爵元飲至三百杯秀眉

明目容儀溫偉

史典論荊州牧劉表跨有南土子弟驕貴並好酒爲三爵大曰伯雅次曰仲雅小曰季雅伯受七升仲受六升季受五升又設大鍼以坐端客有醉酒寢地輒以劉刺驗其醒醉是醜于趙敬侯以筒酒灌人也大駕都許使光祿大夫劉松北鎮袁紹軍與紹子弟宴飲松以盛夏三伏之際晝夜酣飲二方化之故南荆有三雅之爵河朔有避暑之飲

三國蜀志簡雍傳先主拜雍爲昭德將軍時天旱禁酒釀者有刑吏于人家索得釀具論者欲令與作酒者同罰雍與先主游觀見一男女行道謂先主曰彼人欲行淫何以不縛先主曰卿何以知之雍對曰彼有其具與欲釀者同先主大笑而原欲釀者雍之滑稽皆此類也

費禕傳注禕別傳曰孫權每別酌好酒以飲禕視其已醉然後問以國事并論當世之務辭難累至禕輒辭以醉退而撰次所問事事條答無所遺失

魏志陳思王植傳建安二十四年曹仁爲關羽所圍太祖以植爲南中郎將行征虜將軍欲遣救仁呼有所勅戒植醉不能受命於是悔而罷之注魏氏春秋曰植將行太子飲焉偪而醉之王召植植